

आकाशवाणी जयपुर-अजमेर
प्रादेशिक समाचार
दिनांक 13.09.2024 समय: 18.45 बजे

- उपराष्ट्रपति जगदीप धनखड़ विद्यार्थियों का औपचारिक शिक्षा से अलावा ई ज्ञान हासिल करण बाबत कह्यो।
- राज्यपाल हरिभाऊ बागडे कह्यो-माली व्यवस्था ने बेहतर बणावण मांय किसानों को मोटो काम।
- काल हिन्दी दिवस मणायो जावेला-राज्य स्तर को जळसो जयपुर रा सवाईमानसिंह मेडिकल कॉलेज मांय राख्यो जावेला।
- प्रदेश रा न्यारा-न्यारा हलकां मांय बारिश को दौर मंदो पड्यो- धौलपुर मांय चम्बल नदी मांय पाणी को लेवल ऊंचो आवण ऊं आरे-सारे रा हलकां मांय हाई अलर्ट।

00000

उपराष्ट्रपति जगदीप धनखड़ कह्यो है के मौजूदा दौर मांय भारत की ओळखाण ऐड़ा देश की है जो किण ई देश को मोहताज नी है अर भारत की अगुवाई को असर दुनिया मांय निर्णायक साबित व्हे रह्यो है। वे आज अजमेर कने बांदरसींदरी रा राजस्थान केन्द्रीय विश्वविद्यालय मांय त्वसम वीपहीमत मकनबंजपवद पद टपोपज ठीतंज/2047 मुद्दा माथे विद्यार्थियों अर शिक्षकां ने संबोधित कर रह्या हा। उपराष्ट्रपति कह्यो के मौजूदा चुनौती वाळा दौर मांय देश ने लगातार आगे बधावण अर विकसित बणावण मांय नौजवानों की खास जिम्मेदारी है। धनखड़ कह्यो के शिक्षा समानता लावे है अर सगळों ने लगातार सीखता रेहवणा चाहिजे। वे कह्यो के नाकामयाबी स्वभाविक है अर इण ऊं नी डरनो चाहिजे। वे कह्यो के देश मांय बरकत रा मोकळा मौका है अर नौजवानों ने आं को फायदो उठावणो चाहिजे। पर्यावरण प्रदूषण को जिक्र करता थकां उपराष्ट्रपति कह्यो के धरती अर पर्यावरण ने बचावण सारू सगळा ने पौधा रोपणा चाहिजे। वे जोड़ावत सागे वां की मां रे नाम को पौधो रोप्यो। धनखड़ सगळा विद्यार्थियों कां मां रे नाम पौधा रोपण की अपील कीनी। उपराष्ट्रपति राष्ट्रवाद अर एका ने लक्ष्य बताता थकां कह्यो के देश ने हमेशा सब ऊं ऊंचो राखणो व्हेला। उपराष्ट्रपति अजमेर जिला रा सुरसुरा अर नागौर जिला रा खरनाल मांय वीर तेजाजी रा मंदिर मांय दर्शन कीना अर जनता की खुशहाली की कामना कीनी।

00000

राज्यपाल हरिभाऊ बागडे बिरखा को पाणी बचावण सारू बत्तो ऊं बत्तो काम करण अर कृषि विश्वविद्यालयों मांय इण ऊं जुड़्या शोध अर अनुसंधान ने बधावो देवण माथे जोर दीनो है। वे आज श्री कर्ण नरेन्द्र कृषि विश्वविद्यालय, जोबनेर रा बारहवां स्थापना दिवस रे मौक राख्यो ज्या कार्यक्रम मांय बोल रह्या हा। राज्यपाल कह्यो के किसानों भला सारू उत्पादन, ग्रेडिंग अर पैकिंग रा काम घर मांय ई करण की सिखावण देवणी चाहिजे। वे कह्यो के खेतां मांय रासायनिक खाद इस्तेमाल करण ऊं मिट्टी की उपज की ताकत कम व्हे रही है अर रासायनिक खाद काम ले र हासिल करीजी उपज काम लेवण ऊं कैंसर सरीखी बीमारियां व्हे रही है। राज्यपाल जलवायु मांय बदलाव रा मौजूदा दौर मांय बत्ता ऊं बत्ता पौधा रोप र कुदरती तरीका ऊं खेती करण माथे जोर दीनो। वे विद्यार्थियों सागे ई बातचीत कीनी। राज्यपाल खेती-बाड़ी अर पशुपालन ऊं जुड़्या उत्पादों की प्रदर्शनी ई देखी। जळसा मांय किसान आयोग रा अध्यक्ष सी.आर चौधरी विद्यार्थियों कां नौकरी मांगण वाळा की बजाय नौकरी देवण वाळा बणबा की अपील कीनी। वे कह्यो के देश रा किसान हर हाथ ने हुनर अर हर खेत ने पाणी मिलबा की सूरत मांय ई विकसित व्हेला। ई मौके विश्वविद्यालय रा कुलपति डॉ. बलराज सिंह बतायो के विश्वविद्यालय को खास मकसद बायोफोर्टिफाइड किस्मां विकसित करणो है।

0000

केन्द्रीय कृषि राज्य मंत्री भागीरथ चौधरी कह्यो है के केन्द्र सरकार किसानों रा भला सारू ई साल डेढ लाख करोड़ रुपया ऊं बत्ता बजट को प्रावधान कीनो है। वे आज चित्तौड़गढ़ मांय खबरनवीसां सागे बातचीत कर रह्या हा। चौधरी कह्यो के मोदी सरकार किसानों की आमदनी बधावणो तय कीनो है। वे कह्यो के सरकार 14 साखां रा सरकारी मोल मांय बधोतरी कीनी है। चौधरी कह्यो के केन्द्र सरकार प्राकृतिक खेती ने बधावो देवण सारू ई जतन कर रही है। इण रा तैत किसानों ने रासायनिक खाद

छोड र प्राकृतिक खेती करण सारू प्रति हैक्टैयर 20 हजार रूप्या री सब्सिडी दी जा रही है। वे श्री अन्न ने बधावो देवण रो जिक् करता थकां कहयो के सरकार मोटा अनाज री साखां ने बधावो देवण सारू लगातार कोशिश कर रही है।

00000

राज्य सरकार प्रदेश मांय निकाय चुनाव एके सागे करावण री योजना बणा रही है। नगरीय विकास अर आवासन मंत्री झाबर सिंह खर्रा आज चित्तौड़गढ मांय खबरनवीसा सागे बातचीत करता थकां आ जाणकारी दीनी। वे कहयो के वन नेशन-वन इलेक्शन री भांत प्रदेश मांय निकाय चुनाव एके सागे कराया जावेला। वे कहयो के पंचायती राज ऊं जुड्या चुनाव ई एके सागे करावण री योजना है। खर्रा चौमासा पाछे सड़कां री मरम्मत करावण बाबत् ई कहयो। वे कहयो के राज्य सरकार सगळा जिलां ऊं बिरखा रे कारण स्कूलां, सड़कां अर पशुधन रा नुकसाण री जाणकारी मांगी है।

00000

काल हिन्दी दिवस मणायो जावेला। ई मौके भाषा अर पुस्तकालय विभाग री ओर ऊं जयपुर रा सवाई मानसिंह मेडिकल कॉलेज मांय राज्य स्तर रो जळसो राख्यो जावेला। जिण मांय उप मुख्यमंत्री दिया कुमारी, सामाजिक न्याय अर अधिकारिता मंत्री अविनाश गहलोत अर विधायक गोपाल शर्मा रो ई सिरकत करण रो कार्यक्रम है। भाषा अर पुस्तकालय विभाग रा निदेशक मनीष गोयल बतायो के ई साल ऊं हिन्दी सेवा पुरस्कार लेखन री दस विधावां मांय दियो जावेला अर हर विधा मांय 50 हजार रूप्या री रकम ईनाम रा तौर ऊं दी जावेला। जळसा मांय माध्यमिक शिक्षा बोर्ड, राजस्थान री सैकेण्डरी अर सीनियर सैकेण्डरी रा इम्तेहान मांय हिन्दी मांय सौ फीसदी नम्बर लावण वाळा 318 विद्यार्थियां रो मान कर्यो जावेला। श्रीगंगानगर जिला मांय पदमपुर रा एस.एस. आदर्श स्कूल रा दो विद्यार्थियां रो ई राज्य स्तर रा जळसा मांय मान कर्यो जावेला। प्रदेश रा न्यारा-न्यारा जिला मांय ई हिन्दी दिवस रे मौके खास कार्यक्रम राख्या जावेला। हिन्दी दिवस रे मौके राज्यपाल हरिभाऊ बागडे जनता ने शुभकामनावां दीनी है। राज्यपाल वां रा संदेश मांय कहयो के हिन्दी महज भाषा नी है बल्कि भारत री संस्कृति है अर देश रा मान री निशाणी है। वे हिन्दी ने तकनीक ऊं जोड़ र विश्व भाषा बणावण री अपील कीनी।

00000

केंद्रीय मंत्री जितेंद्र सिंह खास स्वच्छता अभियान रा तैत काम री प्रगति री निगराणी सारू समर्पित वेब पोर्टल री सरूआत कीनी है। ई खास अभियान रो मकसद केन्द्र सरकार रा सगळा दफतरां मांय सफाई अभियान चलावणो है। सरकार हर साल दो ऊं 31 अक्टूबर ताई सफाई अभियान चलावण रो फैसलो कीनो है।

0000

उत्तर पश्चिम रेलवे काल ऊं 01 अक्टूबर ताई स्वच्छता ही सेवा अभियान चलावेला। इण रो मुद्दो स्वभाव स्वच्छता- संस्कार स्वच्छता राख्यो जावेला। उत्तर पश्चिम रेलवे रा मुख्य जनसम्पर्क अधिकारी कैप्टन शशि किरण आ जाणकारी दीनी। वे बतायो के 02 अक्टूबर ने गांधी जयंती 'स्वच्छ भारत दिवस' रा तौर ऊं मणायी जावेला। स्वच्छता ही सेवा अभियान रा तैत रेलवे टेशनां, दफतरां, रेलवे कॉलोनियां, स्वास्थ्य इकाइयां अर रेलवे लेणां माथे श्रमदान कर र स्वच्छता अभियान चलायो जावेला। ई रे अलावा रेलवे टेशनां रे आरे-सारे री ग्राम पंचायतां मांय स्वच्छता चौपाल लगायी जावेला। अभियान रा तैत सफाई कर्मचारियां सारू स्वास्थ्य जांच शिविर, मैराथन, साइक्लोथन, खेलां री होड़ां अर पौधा रोपण रा कार्यक्रम राख्या जावेला।

00000

प्रदेश रा घणखर हलकां मांह बिरखा रा दौर मंदो पड गयो है हालांकि ऊगणी हलका मांय चौखो मेह बरस्यो है। आं हलकां मांय लारला तीन दिन ऊं व्हे रही लगातार बारिश रे कारण हाल ई कई ठोडा पाणी भरयोडो है। धौलपुर जिला मांय चंबल नदी खतरा रा निशाण ऊं महज साढ़े तीन मीटर नीचे बह रही है। नदी मांय पाणी रो लेवल बधबा रे कारण ई रा आरे सारे रा हलकां मांय जनता ने सावचेत कर दीरीजी है अर एनडीआरएफ अर एसडीआरएफ री टीमां तैनात करी ज्यी है। पाली रा सांसद अर पैली वाळा केन्द्रीय मंत्री पी.पी. चौधरी आज जोधपुर ग्रामीण जिला रा बिलाडा मांय जसवंत सागर बंधा माथे चाल रही चादर दी अर अहलकारां ने ज़रूरी हुकम दीना। ई बीचे सवाईमाधोपुर जिला मांय काल व्ही जोरदार बिरखा पाछे आज मौसम साफ रह्यो। शहर रा नीचला हलकां मांय हाल ई पाणी भरयोडो है। जयपुर मांय ई आज मौसम साफ रह्यो। हालांकि आखा दिन बादळा मंड्या रह्या। मौसम विभाग आज कोटा, भरतपुर, अजमेर, उदयपुर अर जयपुर

संभाग मांय कठे-कठे बिरखा रा आसार जताया है। भरतपुर संभाग मांय कठे-कठे 30 ऊं 40 किलोमीटर प्रति घंटा री रफ्तार ऊं बायरो बाजण रा आसार है। जोधपुर संभाग मांय कठे-कठे बिरखा व्हेवण री संभावना है।

00000

भीलवाड़ा जिला रा हुरड़ा मांय तीन बच्चों री नाडी मांय डूब जावण ऊं मौत व्हे गयी। पुलिस अर प्रशासन रा अहलकार मौके पूग र लाशां ने निकळवायी। लाशां ने गुलाबपुरा सामुदायिक अस्पताल रा मुर्दाघर मांय रखवायी ज्यी है।

00000

प्रदेश मांय आज तेजा दशमी रो पर्व सिरधा भाव सागे मनायी ज्यो। ई मौके नागौर जिला रा खरनाल मांय खास मेळो भर्यो। नीमकाथाना मांय लोक देवता तेजाजी री शोभायात्रा निकाली ज्यी, जिण मांय मोटी तादाद मांय जातरु सिरकत कीनी। सवाईमाधोपुर जिला मांय न्यारी-न्यारी ठौड़ां मेळा अर दूजा धार्मिक कार्यक्रम राख्यी ज्यो। झालावाड़ मांय तेजाजी रा स्थानकां माथे मोटी तादाद मांय पूग्या जातरु पूजा-अर्चना कीनी अर तेजाजी री शोभायात्रा निकाली ज्यी। जयपुर ग्रामीण जिला मांय बस्सी उपखण्ड रा जटवाड़ा गांव मांय तेजा दशमी रे मौके सांप ने न्यौतो दियो ज्यो अर खीर, पुआ, पूड़ी रो भोग लगायी ज्यो। बारां जिला मांय ई मेळा भर्यो। कोटा मांय ई तेजाजी रा थानकां माथे मोटी तादाद मांय जातरु पूग्या। आज ई बाबा रामदेव जयंती रे मौके जैसलमेर जिला रा रामदेवरा मांय मोटी तादाद मांय जातरु खास पूजा अर्चना कीनी। मन्दिर समिति अर जिला प्रशासन री ओर ऊं जातरुआं रा सुबीता सारु सगळा जरूरी इंतजामात करी ज्यो। चूरु मांय रामदेव जयंती रे मौके शोभा यात्रा निकाली ज्यी। श्रीगंगानगर मांय जातरुआं सारु लंगर लगायी ज्यो अर बाबा रामदेव मंदिर सामी मेळो भर्यो।

00000

एक पेड़ माँ के नाम अभियान रा तहत आकाशवाणी चित्तौड़गढ़ मांय आज पौधा रोपी ज्यो। ई मौके अहलकार अर कर्मचारी 33 पौधा रोप र वां री सार संभाळ री जिम्मेदारी लीनी।

000

जोधपुर ऊं जाडन ताई शहीद अमृता देवी रा नाम परां चार लेण री सड़क बणायी जावेला। उप मुख्यमंत्री दिया कुमारी आज जोधपुर ग्रामीण जिला रा खेजड़ली मांय आ जाणकारी दीनी। वे अमृता देवी शहीद पार्क मांय पर्यावरण री हिफाजत सारु शहीद व्ह्या साढे तीन सौ ऊं बत्ता पर्यावरण प्रेमियां ने सिरधा भाव सागे याद करण सारु राख्यी ज्यो कार्यक्रम मांय सिरकत कीनी।

ई मौके वे कह्यो के पेड़ है तो जल है अर जल है तो जीवन है री बात म्हां ने आज समझ आ रही है जो ऐ पर्यावरण प्रेमी 300 साल पैली ई जाणता हा। वे कह्यो के बजट मांय अमृता देवी स्मारक बणावण रो ऐलाण ई करी ज्यो है। श्रीगंगानगर मांय ई पर्यावरण अर रूखड़ां ने बचावण सारु दिया ज्यो बलिदान री याद मांय आज खास श्रद्धांजलि कार्यक्रम राख्यी ज्यो। कार्यक्रम रा तैत जिला मुख्यालय रा बिश्नोई मंदिर मांय मां अमृता देवी समेत बलिदान देवण वाळा साढे तीन सौ ऊं बत्ता पर्यावरण प्रेमियां ने सिरधा भाव सागे याद करी ज्यो। ई मौके खेजड़ी रा पौधा रोपी ज्यो।

00000

सवाईमाधोपुर जिला रा खिरनी गांव मांय बीती रात एक घर माथे मस्जिद री मीनार पड़ जावण ऊं एक जणा री मौत रा मामला मांय आपदा राहत मंत्री किरोड़ी लाल मीणा आज खिरनी पूग्या। वे मरण वाळा रा पिरवार वाळां सागे मुलाकात कर र हादसा माथे दुःख जतायो। मीणा गांव वाळां ऊं शांति बणायी राखण री अपील कीनी।

00000

प्रधानमंत्री नरेन्द्र मोदी ई महीना री 29 तारीख ने आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 114 वीं कड़ी व्हेला। आप ई आप रा विचार 27 सितंबर ताई मुफ्त नंबर 1 8 0 0 - 1 1 - 7 8 0 0 माथे भेज सको हो। ई सागे ई 1922 नम्बर माथे पर मिसड कॉल दे र एस. एम. एस. ऊं मिल्या लिंक रे जरिए ई राय दी जा सके है। नरेंद्र मोदी एप या माई जी.ओ.वी. ओपन फोरम रे जरिये ई राय दी जा सके है।

000000